

Die AGF bräsendiert:



Hallo lieve Leser vumm Gebabbelheft, meer fräen uns, dass merr widder mool e Hefdel mit pälzer Texte uff die Bää gschdellt hänn. Dess werdd jo immer schwierischer, weil die Schreiwerei halt nit jedem liggt unn so wennisch Beidrääg bei uns oidreffen. Die meischde junge Leit babblen fascht bloß noch hochdeitsch unn die annre hänn entwedder nix zu sage odder awwer känn Bock druff, mool was uff Pälzisch zu browiere. Dass unser Schbrooch die Bach nunner geht merkt merr jo schunn allää do dra, dass sich so viel Leit drum bemiehen, sie zu erhalde. Dodra sieht merr, dasses schunn arg needisch iss. Do falle merr grad e paar Beischbiele oi:

De Dogder Poscht hott jo vor 10 Jahr schunn dess Pälzer Werrderbuch mit 6 Bänd ferrdisch gschdellt, dess die Bayrische Akademie der Wissenschaft 1913 agfange unn die Määnzer Akademie 1997 abgeschosse hot. Pälzisch iss konserviert unn vielleischt gibt's in 100 Jahr an de Uni enn Schdudiegang in Pfälzisch - so wie heit Altgriechisch odder Laddein.

Vor korzem hott misch de Dr. Drenda vunn de Uni Määnz - Inschdituut ferr gschichtlischie Landeskunde ausgewählt, beim Werrdersuche mitzuhelfe. Der känn unser Gebabbelheft unn will Flomerschemm in soin linksrhoinische Dialektatlas uffnemme.

Iwwer 100 Frooge mit Bilder waren in dere Unnersuchung zu beantworte. Do waren ah ganz knifflische debei - wie: Wie hääßt Noochgeburdt beim Vieh ??? Dess hott känner vunn uns saage känne, bloß de Herr Mohr hott e Antwort noch gewisst: "Dracht" hott merr als dodezu gsaat.

Do hott sisich sogar de Dogder Drenda gewunnert, dass merr dess rausgfunne hänn unn dass merr noch so viel, fascht ausgschdorwene Ausdrigg ausgegraawe hänn.

Noch enn Beweis: E Schülerin vumm Karo-Gymnasium hott e Facharbeit zum Thema " Ist der Pfälzer Dialekt vom Aussterben bedroht ?" schreiwe solle. Sie hott misch gfroogt, ob isch ihr do e bissel wass dezu sage känn.

Dess weer jo an sich e ganz normalie Sach, awwer der Hinnergrund iss, dass die Lehrerin sie ausgewählt hott, weil se gheert hott, bei ihr dehääm deht jo

noch pälzisch gebabbelt werre. Nä sowas. Dess hääßt, dass alle annre Abituriende in "hochdeitsche Haushalte" uffwachsen. Unser pälzer Mädle iss sozusage enn Exot in ehre Klass.

Awwer dess Hochdeitsche iss ah nimmie dess, wasses mool war. Dialekt iss verpöönt, bloß noch englische Werrder sinn "in". Alles werdd uff englisch ausgedriggt unn meischdens schdimmen die Bezeichnunge garnit. De "Airbag" iss jo gar känn zsammegegrumpelte Luftsack, do iss nämlisch gar kä Luft, sondern e gefhrlisches Gas drinn, awwer Airbag klingt halt viel harmloser. Die Auskunft bei de Bahn muss naddierlich "Service-point" hääße, annerscht dehts merr jo nit verschdehe.

Isch sag bloß dess Schdischwort: "Videorecorder programmire". Dess iss heit e Wissenschaft ferr sisch - do kammer leicht enn "Error" mache unn dodebei enn Horror grigge.

Friher hott merr äfach soi Zeig zum Veschbre mitgenomme, heit braucht merr am "Weekend" zum "Outdoor-Event" soi "Equipment". Do hott merr äfach soi Thermoskann oigepackt, wozu merr jo heit "Coffee to go" sage muss. Wer in die Inneschdadt will, der kann nit äfach middem Pendelbus fahre, nä, der muss de "Bus-shuttle" benutze.

Vunn Wellness unn Co. will isch erscht garnit afange, vunn wäge "walking" unn "relaxe"unn "antiaging" unn so'n Kram..

Im Internet kummen dauernd "emails" mit "newsletter" vunn allemögliche "Webmasters". Do isse als grad erholsam, wann die Fraa Bischer, die Referentin vunn unserm OB Wieder, vunn de Schadtverwaltung Frankedahl enn hundsgewähnliche "Bürgerbrief" als elektronisches Rundschreiwe verschickt.

Wann im Theater-Alte-Werkstatt de Mundartpreis verliehe werdd, känn merr doch genausogut ah "Dialect-Theater-Award" dezu sage - dess weer doch echt "cool".

Do hab isch grad im Internet so enn schääne bassende Satz dezu gfunne:

"Erstmals wird in diesem Jahr der Open Source Best Practice Award verliehen, mit dem vorbildliche Case Studies und Success Stories zum Einsatz von Open Source Software ausgezeichnet werden."

Ja, do iss jo alles demit gsaat unn jeder wääß Bescheid - wass will de Mensch noch mäh.

Demnestscht sagt merr zu de Butzfraa "*Environment Improvement Technician*", zum Tankwart "*Petroleum Transfer Engineer*", zum Kantinehelfer "*Education Centre Nourishment Production Assistant*", zum Fenschterbutzer "*Waste Removal Engineer*", zum Kondrollöör "*Mystery Fair Visitor*", zum Müllfahrer "*Waste Removal Engineer*" unn zum AGF-Owwerverhandlungsfiehrer Rainer Hannemann sage merr dann "*Head of Verbal Communications*".

Wann awwer dann enn Määschder enn "Bachelor" iss - was jo in Inseiderkreise "Bätschela" ausgeschbroche werdd, dann wollen alle Fußballveroine "Deutsche Bätscheler" werre - unn dess klingt jo dann schunn widder verdammt guud pälzisch. *** It's time to talk - gell ??

Walter Rupp

De Gansert

Die Mudder un de Vadder in de Kerchegass hänn hinne im Gaade e Plumsklo g`hat. Drumrum war de Gänsepärsch. Weil mer acht Enkelscher waren hot uns de Vadder glei newerm große Heisel e klänes Aabeele gebaut. Mir waren all ganz schdolz, un wollten nadierlich immer druff.



Ich war mol wieder in Flomerschumm un wollt nadierlich glei ufs kläne Aabeele. „*Nemm de Besse mit, wegem Gansert*“, hot die Mudder zu mer gsaat.

Ich, mit dem Besse bewaffnet in de Gänseperch, de Gonserd misch gsehe un uff mich los gonge war äns. Ich hawwen mit dem Besse am Kopp getroffe un er is umg`falle wie en Sack.

Ich hab mich furschdbar verschreckt. „*Mudder, Mudder ich hab de Gonserd doodgschlage!*“ Die Mudder is glei mit naus, do hot er sich grad widder uffgerabbelt.



Ihr kennt mer`s glaawe, dass ich nie mehr allee uffs schöne kläne Aabeele gonge bin. Sobald ich in die Näh kumme bin, hot er verrickt gschbielt. Awwer wie mer sieht, ich bin älter worre wie de Ganserd.

Iris Adam (Ehrhard) - Kirchheimbolanden

Viiiieel drinke !!!

Isch grigg als grad die Krise, wann enn Dogder - egal ob Arsch- odder Zahndogder - als Erschdes sescht:

"Sie missen viiiiieel meer drinke - gell !! 3-4 Lidder am Daag - mindeschdens"

Isch hab schunn immer gedenkt, dass dess blooß widder so e Modeerschoinung iss, wu ähner emm anner noochbabbelt unn känner rischdisch erforscht hott. Jeder Gelehrte, der wass uff sisch halt, setzt noch enn Schobbe owwedruff. Bei de Kundschaft macht sisch dess ganz guud, wammer glei enn Tipp zur Hand hott. Die Gliggerwasserlieferande sinn do voll druff abgfahre unn breisen ehr Schbrudel wie Danzischer Goldwasser ah.

Jetzt iss endlich wissenschaftlich bewiese, dass der Trinkerwahnsinn gar kä Grundlag hott unn garnix bringt unn dass sisch enn Haufe Leit ummesunscht queelen unn mit Gewalt jeden Daag e paar Lidder Brieh in sisch noischidden. Do iss merr jo die halb Nacht unnerwäägs unn dauernd am Pinkle.

Also - isch mach weider wie immer, isch drink soviel isch Dorscht hab unn nit solang, biss merr`s zu de Ohre rauskummt.

Walter Rupp

Kinnermund

On nemm Samschdagmiddag war isch grad middem uffroome vun de Garasch beschäffdischd. Moi Froindin Heike, Mudder vunn 3 Kinner, iss mit erm klenschde Wirwelwind Elisa de Feldweg entlong gfare - als se mich on de Garasch gsehe henn, hawwense okalde. Zu denne Kinner muss isch vorab noch sage, dass die voll in Ordnung sinn, awwer de klee Elisa muss mer halt monschmol sage dasses net so doll mache soll.

Na, ä Wort hots onnere gewwe, noch e bissel iwwer die Welt verzeht unn die Heike sescht zum Schluss: „*Ach was gibt`s doch ver schlimme Mensche uff dere Welt!* „

Die klee Elisa guckt misch o, unn isch die Elisa - do hab isch in dem kleene Krabbe soine Aage genau gsehe was die jetzt denkt. Ich hab donn gsaat: "*Gell Elisa awwer die allerschlimmscht Fraa uff dere Welt bin isch fer disch!?*"
"*Nee, im Urlaub war e Fraa, die war noch schlimmer wie du!!* „

Iris Fischer

Des gibt`s nur in Flomerschumm

Unser Kinner waren noch klee unn sinn do in Flomerschumm in de Kinnergaade gonge. Unn wie des halt uffem Dorf so iss, jeder kennt jeden (wonner will).

Do drunner a e Familje mit 3 Kinner die erscht so 5 Jahr do gewohnt henn. Die henn hier niemond katte, ke Oma, Opa odder Dante wu se die Kinner mol hetten hie due kenne wann mol was iss.

Unn donn wars soweit.....

Die Mutter vunn denne Kinner hot misse Nachts ins Kronkehaus wegere Not-OP, also hot sisch de Vadder de negschde Daag frei genumme.

Moiens ging jo alles noch gut, de Groß (8) in die Schul, die Middlerschd (5) in de Kinnergaade, unn die Klee (2) widder mit häm.

Um 12 Uhr des Gonze widder Rickwerts, de Groß aus de Schul, die Middlerschd vumm Kiga hole unn do isses bassiert.....Als er mit dere Klee in de Kiga noi gerennt is, isser umgegnaxt unn hot sisch de Haxe gebroche - so unn jetzt enn dicke Fuß, enn dicke Kopp, 3 Kinner unn des alles uhne Fraa.

Des hot die änd Mudder mitkriegt unn schunn hot die, die Kinner uff 3 Midder verdählt, die hot sisch de Vadder gschnabt unn hotten in die BG Unfallklinig gfare wu zum Glick soi Nochbern gschaft hot, die dann a dehem nochem geguckt hot. Die Kinner waren dann nur zum Schlofe dehem, unn iwwer Daag waren se in de Schul, Kiga unn bei ehre Ersatzmidder.

Unn do sieht mers mol widder, so was ging in de Stadt net, die Hilfsbereitschaft gibt`s nur in Flomerschumm !!!!!!!!

Iris Fischer

UNSER HAUPTGEWINN

Vunn denne viele, viele Emääls, die jeden Daag im Combjuuder landen, iss ab unn zu mool was debei, wu merr ah ernschthafft driwwer noochdenke kann. Äh schäänes Beischbiel hab isch mool uff unser pälzisch iwversetzt:

Jetzt schdelle merr uns mool vor, meer hedden in ´re Lodderie de Hauptpreis gewunne - unn zwar kämen audomadisch jeden Daag 86.400 Euro uff unser Bankkonto gflattert - ganz regelmäbisch - Daag ferr Daag.

Dess Ganze iss bloöß an 2 Regle gebunne:

1. Alles, wass merr bis Middernacht nit ausgewwe hott, verfallt - uff e anner Konto iwverweise geht nit. Am negschde Moje sinn dann widder neije 86.400 Euro uff unserm Konto, die widder um Middernacht verfallen usw.

2. Niemand wääß, wie lang dess Ganze dauert.

Plötzlich kann Schluss soi unn unser Konto bleibt ferr immer leer.

Wass dehte merr also mit dem Gewinn alles mache?

Zuerscht mool alles kaafe, wass merr schunn immer gern ghatt hett, ferr uns selbscht unn ah ferr Leit, die merr kennt unn ah gut leide kann unn dann ah ferr anner Leit, die merr nit kennt unn die´s bidder needisch hedden. Merr deht versuche, soviel wie möglich unnerzubringe, weil merr wääß, dass alles, was merr nit ausgibt, verlore iss.

Dess Ganze heert sisch jetzt alles es Bissel verringgt ah, gell?

Awwer nää, dess iss im Grund die Wirklichkeit, bloß dass dess Bankkonto die ZEIT iss unn die Euros SEKUNDE sinn. Unser ganz Lääwe iss wie so e magischie Bank - bloß sieht merr se halt nit.

Jeder Daag beschert uns 86.400 Sekunde, die merr zum Lääwe zur Verfügung hänn. Egal was merr draus macht, um Middernacht werd dess Zeitkonto geleert. Was merr nit genutzt hott, geht unwiderbringlich verlore.

Geschdern iss Vergangeheit unn kummt nimmi zurick.

Mojens iss dess Zeitkonto widder uffgelade unn meer känn widder loslegge ---- awwer niemand wääß wie

lang dess so geht. Jederzeit kann Schluss soi - ganz uhne Vorwarnung.

Deswege soll merr sisch guud iwverlegge, wass merr mit soine tägliche 86.400 Sekunde macht. Die Zeit rennt schneller fort, als merr gugge kann.

Isch glaab es lohnt sich, mool do driwwer e Bissel noochzudenke.

Also dann - isch winsch alle Leser enn schääne Daag!

Walter Rupp



De Fruthe Philpp war vun all dene alde Baure im Dorf die ich kenn, kä besondrie Ausnahm. Jeder hot uff soi Art e luschiedischi „Magge“ g`hat, so a de Philpp. Er war Radrennfahrer vun Jugend a un als solscher bekannt, nochem Krieg. Er wars mit Leib und Seel. Sei Bawwet un sei Rennrad war soin Lewensinhalt.

Zu de Bawwet warer rischdisch defdisch uns Rennrad war sei Maschin. Zu mir, ich war noch en Schulbu, hot die Bawwet g`saat, wann de Philpp zum Hofdor naus geht un links abbiegt isses bassiert, mer is lieber wonner reschts abbiegt (doch dodevun speeter!) de Philpp is halt en verriggte Kerl. Soi Kabriole waren schun zum kabuttliche, mir war der Mann e Rädsel, trotzdem wars lustisch un a traurisch. Wann de Philpp mit soine Maschin los g`fahre is, hot er g`schtrahlt iwwers gonze Gsicht un soi gekrimmdi Peif hot er in die Zäh noig`hängt. Allää schuns uffsteige uf die Maschin war sehenswert un jeder wus g`sehe hot, hot zwar nix gsagt awwer gschmunzelt, so zum Beischbiel die Maria un ehr Mudder. Doch noch 100m Fahrt bis on de Falter war sehr oft die Radtour zu end. S war wie so oft Freidagowend, hawwen e paar Kerl am Eck vuns Schowalders gschdonne. Ener hot ogfange Beifall zu klatsche un hot a noch „bravo Philpp“, gerufe.

Des war nadirlisch zu viel, des hotten zur Weißglut gebrocht. Voller Zorn isser dem Rufer nochgfahre, doch die onner Bagasch hot nadirlisch erneut geklatscht und Bravo gerufe. Jetzt warer om platze, der wu ab is, war viel schneller als der alde Knacker un do debei is er ah noch gschderzt. Die Gobber-Nas hot nadierlich dene Jingere g`saat was Sache is. Brummend is de Philp zu soiner Bawwet kumme.

Schnell hot se ehrn Monn mit Kamillewasser und Melkfett verarzt. Ehr Schweige war fer den verletzte Stolz vum Philpp wie Medizin. Die wässrische Aage im Philpp soim faldische Gsicht hot de Bawwet e Lächle iwwer ehr Lippe gebrocht. Die zwee waren sich net gleichgildisch, doch plötzlich hot de Philpp soi Peif feschter in die Zohlicke geklemmt un debei gebrummt „Isses Esse ball ferdisch?“.



Die Bawwet war ruck-zuck im Haus, aus de Kich war noch gut zu here „So en verrickte Kerl“.

Die Salbung uf de Haustrepp war zuend, es war net die letscht.

Irgendwann verzehl ich wies war, wonn de Philp ausm Hofdor iss und nooch rechts die Hessemer Stroß nuff iss.

En alde Flomerschummer

Die Worschtsuppverlängerung

In de schlechde Kriegs- unn Noochkriegsjohre war e gudi Metzelsupp e ganz wertvolli Abwechslung unn e Uffbesserung im Schpeiseplan.

So ab Oktower hänn die Baure all gschlacht. De Eppstäner Hoffmann war domols en dorfbekante „Adventsmetzger“. Als Buu bin isch als mit emm Bleschkännche zum Worschtsupphole gschickt worre. Domols, in de Eppstänerschdroß isch war mit äner ganz alde Fraa unnerwegs sinn merr glei am Hofedoor ageknewwert worre :“ ach godd, jertzert kummen ehr aa noch“. Sie hott die Händ üwwerm Kopp zusamme gschlache, holt enn Wasseräämer. Losst den fascht voll laafe unn schitt des ganze Wasser in de Worschkessel. Wie se dann kräftisch drinn rumriehrt mit re große Holzkell nimmt de Metzger Hoffmann ehr de Löffel ab unn schickt se fort, Ebbes zu hole. Als die Fraa ford war, schdischt er mit äner große Fleeschgawwel mehrmols in die kochende Werscht, rieht kräftisch drin rum unn sescht zu mer: so, Buu, jertzert iss es widder e rischtischi Worschtsupp.

Bosch

Kimmerschdreische in de Kriegszeit

In de Kriegsjohre 1939-1945 mit denne viele Bombeagriff hots owends unn nachts e schdrenge „Verdunklungspflicht“ gewwe. Kä Schdroßeladdärn, kä Lischd in de Fenschder noch auße, kä uffenes Feier, unn die wennische Autos hänn mit kläne Lischdschlitze an de Schoiwerfer nachts fahre müsse. Alle Fenschderlääde - moderne Rollos hots noch nit gewwe - hänn zu soi misse unn abgedunkelt. Schdockdunkel wars iwverall im Dorf. Mer Buuwe hänn dann die „Fenschderlademänncher“, die zum Feschtmache funn de Fenschderlääde waren, uffgschdellet, im 2. Schdock sogar mit emm lange Schdecke.









Morjens, wann die Leit die Lääde uffmache unn feschdmache wollten, sinn se net an die „Lademänncher“ drakumme. Die Ärm waren zu korz, weil die „Lademänncher“ hinner de Ladefligger verschdeckt waren.

Koppschittle, Rädselroode! Wer hott sich den Ufuch ausgedenkt? De Verdacht fiel nadierlich uff die Kafruse vunn Owwer- unn vumm Unnerdorf.

Mer Buuwe hänn uns also widder ebbes neues eifalle losse misse.

Bosch





1	C	H									
2						C	H				
3											
4			C	H							
5											
6			C	H							
7											
8											
9	H	E	U	S	C	H	R	E	G	K	E
10											
11						C	H				
12						Z	Z				
13			H								



12 **LOTTO 6 aus 45** ↓
 (27) (39) (3) (17) (28) (42) (13)
 4+5+6+7+8+9+10



Wass in denne Bildscher zu sehe iss, kammer links in die Käschdelscherr noischreiw - uff hochdeitsch. Dann schdreischt merr die entschbreschende Buschdaawe durch.
 Wass iwwrish iss, kummt als Leesungssatz uff pälzisch in die unnere Käschdelscherr.
 Dess Rädsel iss dessemoool garnit so äfach - awwer's gibt jo ah widder Ebbes zu gewinne unn isch hab jo schließlich ah enn Haufe Ärwert demit ghatt.
 Viel Schbass winscht Walter Rupp

					C	H											C	H
					C	H												

Die Kerweredd 2008

Grüß Gott, guten Tag, ihr seid jo all do,
es iss widder Kerwe, was bin ich so froh,
ich freu mich halt immer, wenn ich sie all seh',
dann bin ich optimistisch- die Kerwe wird schee.
Es ganz Johr wart man gespannt, bis die Kerwe kommt in's Land,
und jetzt ihr Leit isses soweit, in Flomerschumm iss Kerwezeit.

Vier Tage und vier Nächte lang,
verspürt man diesen innren Drang,
nach Bratwurst, Bier und viel Gesang.
Es zieht einem hin auf diesen Platz,
hier gibt es Stimmung und Rabatz,
hier triffst du wieder Gott und die Welt,
bei de Zwiwwelböck im Kerwezelt.

Ich hab als Begrüßung so ein Rundumschlag gemacht,
mit Grußworte haben sie ja meine Vorredner schon bedacht,
doch zwei Gäste grüß ich persönlich, das ist Tradition,
als erstes OB Wieder, denn kennt ihr ja schon,
und dann noch Miß Strohhut, Julia Fast, eine Wonne,
wo sie auftaucht scheint die Sonne.

Sie kennt uns noch net, drum erzähl ich ihr knapp,
was Flomerschumm so besonders macht:

Wir liegen, wie könnts annerscht soi,
schunn immer linkerhand vom Rhoi.
Schon in Urzeite hat man festgestellt,
hier ist de Nabel von der Welt.

Hier wäre, dass hab ich mal gelese,
das Vorbild fürs Paradies gewese.

Pälzer Woi und Pälzer Worscht,
Pälzer Leit und Pälzer Dorscht,

Flomerschummer Grumbeere und Pälzer Rebensaft,
wer bei uns wohnt hots geschafft.

Flomerschummer leben allezeit, schunn immer uff de Sunneseit.

Wir sind, Miß Strohhut, do kommen sie leicht dehinner,
em liebe Gott sei Lieblingskinner.

Deshalb, sie können mir es wirklich glaabe,
Flomerschunmmer sein ist eine Gottesgabe.

Damit sie das Gefühl kriegen, von was ich hier rede,
also wie lässt es sich in Flomersheim lebe,
werden sie jetzt kurzer Hand, dank meiner Macht,
für 4 Tage zum Ehrenbürger von Flomerschumm gemacht.

Damit können mir protze, das iss ganz gewiss,
weil ab sofort die Miß Strohhut aus Flomerschem iss.
Ich hör jetzt schon wie am Montag de OB zum Hebich spricht,
Miß Strohut aus Flomerschem, die sinn net ganz dicht.

Am letzten Freitag hab' ich moins um halb
sechs in die RHEINPFALZ geguckt
und mich beinah am Kaffee verschluckt.
Da stand auf Seite 6 ganz groß und breit,
ab morgen iss Flomerschummer Kerwezeit.
Ich habs nochmol gelese, unn bin mords erschrocke,
mir ist im Sitze de Schweiß ausgebroche.
Und des iss selten bei uns Bahn-Beamte,
dassmuss ich euch wisse lasse,
wer bei uns nämlich schwitzt wird normal gleich entlasse.
Ich hab dann schnell moi Fraa geweckt,
„hol merr Papier ferr die Kerweredd'.
Rainer, du spinnst, hör ich sie dann sage,
die Kerwe in Flomerschumm ist erst in 8 Tage.
Ich hör uff moi Fraa weil die dess so will,
ich hab trotzdem gemeint es wäre de erste April.
Drum sag ich hier noch mal, damit ihr des endlich wisst,
wann in Flomerschumm die Kerwe ist.
Zuerst kummt Eppstää - am Sonntag Nr. 3,
ist die Kerwe dann dort vorbei,
kommt am Sonntag Nr. 4 meistens dann die Kerwe hier.
Doch manchmal ist das halt nicht richtig,
die Anzahl der Sonntage im August ist wischdisch.
Bei 4 Sonntage weiß man dann,
wir sind 8 Tage nach Epstää dran.
Bei 5 Sonntage, dess kann ich eich sage,
beträgt der Abstand 14 Tage.
Also noch mal zum Mitdenke:
Am 3. Sonntag im August, herrscht immer in Eppstää Kerwelust,
noch im August, am letzte Sonntag dann, sind die Flomersheimer dran.
Wer es jetzt noch net kapiert hat, dem biete ich an,
„Kerwe-Termin-Training“ kostenlos beim Hannemann.
De RHEINPFALZ sag ich persönlich Bescheid,
damit ihr das alle wisst ihr Leit,
das sage ich hier, so wahr ich hier sitze,
die bringen mich moins um halb sechs net mehr zum schwitze.

20 Jahr lang Chef im Ort, 20 Jahre Dietmar Borth,
doch 2009 ich sags grad raus,
macht de Dietmar dann die Hack eraus.
Er hat in diesen 20 Jahren,
oftmals schwere Last getragen.
Selten gelobt und oft kritisiert,
doch das hat ihn nur inspiriert.
Doch alle seine Aktivitäten hier zu nennen,
würde den Umfang der Kerweredd sprengen.
Aber vieles hier in unsrem Ort, trägt die
Handschrift vom Dietmar Borth.



Wenn in de AG die Frage war, wie kommen wir an
was dran,
ei ruf doch mol beim Dietmar an,
der weiß sicher die Lösung, der kennt Gott und die Welt,
der weiß wie was geht - auch ohne viel Geld.
Wenn der an was dran war, das muss mer halt wisse,
hot der sich richtig festgebisse.
Gekämpft, genervt und rumgemacht,
bis das Werk dann war vollbracht.
Doch besonders politisch, auch aus de eigene Reihe,
konnte ihm mancher sein Engagement net verzeihe.
Versteht ihr dess? Ich net und das macht mich verrückt,
awwer es haben manche neidisch nach Flomersheim geblickt.
Doch so isses halt in de Politik, dem eine stinkts dem annere nit.
Doch manchmal auch, unn des sinn kä Bosse,
ist er in seinem Eifer übers Ziel naugeschosse
und bei so manchen Dingen, dess müßt ihr versteh',
do hätt ich ihm könne glatt de Hals rumdreh.
Ooch hab ich dann gedenkt, loss en geh, de Borth,
Hauptsach' was er macht iss gut für de Ort.
Eventuell hätte er müssen, dess iss allerdings net zum lache,
net viel tun für de Ort, also net viel mache.
Net motze, parteitreu und politisch loyal,
dann wäre er vielleicht jetzt Bürgermeister in Frankenthal.
Ich weiß ja, das war etwas geschleimt,
aber es hat sich halt gut gereimt!
Doch es kam anders - zum Glück für uns all,
blieb Dietmar bei uns im heimischen Stall.
Danke Dietmar für die erfolgreiche Zeit,
Danke Dietmar von fascht alle Leit'.
Danke Dietmar von vielen Leuten im Land.

Damit können mir protze, das iss ganz gewiss,
weil ab sofort die Miß Strohhut aus Flomerschem iss.
Ich hör jetzt schon wie am Montag de OB zum Hebich spricht,
Miß Strohut aus Flomerschem, die sinn net ganz dicht.

Am letzten Freitag hab' ich moins um halb
sechs in die RHEINPFALZ geguckt
und mich beinah am Kaffee verschluckt.
Da stand auf Seite 6 ganz groß und breit,
ab morgen iss Flomerschummer Kerwezeit.
Ich habs nochmol gelese, unn bin mords erschrocke,
mir ist im Sitze de Schweiß ausgebroche.
Und des iss selten bei uns Bahn-Beamte,
dassmuss ich euch wisse lasse,
wer bei uns nämlich schwitzt wird normal gleich entlasse.
Ich hab dann schnell moi Fraa geweckt,
„hol merr Papier ferr die Kerweredd'.
Rainer, du spinnst, hör ich sie dann sage,
die Kerwe in Flomerschumm ist erst in 8 Tage.
Ich hör uff moi Fraa weil die dess so will,
ich hab trotzdem gemeint es wäre de erste April.
Drum sag ich hier noch mal, damit ihr des endlich wisst,
wann in Flomerschumm die Kerwe ist.
Zuerst kummt Eppstää - am Sonntag Nr. 3,
ist die Kerwe dann dort vorbei,
kommt am Sonntag Nr. 4 meistens dann die Kerwe hier.
Doch manchmal ist das halt nicht richtig,
die Anzahl der Sonntage im August ist wischdisch.
Bei 4 Sonntage weiß man dann,
wir sind 8 Tage nach Epstää dran.
Bei 5 Sonntage, dess kann ich eich sage,
beträgt der Abstand 14 Tage.
Also noch mal zum Mitdenke:
Am 3. Sonntag im August, herrscht immer in Eppstää
Kerwelust,
noch im August, am letzte Sonntag dann, sind die
Flomersheimer dran.
Wer es jetzt noch net kapiert hat, dem biete ich an,
„Kerwe-Termin-Training“ kostenlos beim Hannemann.
De RHEINPFALZ sag ich persönlich Bescheid,
damit ihr das alle wisst ihr Leit,
das sage ich hier, so wahr ich hier sitze,



warn wir mit Traktor und Hänger in de Wingert droi.
Die SPD macht die Tour auch noch, jetzt spreche ich leise,
die nennen das Ganze dann Bildungsreise.
Die Idee ist net schlecht, jetzt tu ich mol nexxe,
so kann man Esse und Trinke an de Steuer absetze.

So, jetzt ist halt wieder mal Schluss,
weil ich vum Freibier mol trinke muss.
Ich freue mich mit euch, keine Frage, auf vier tolle Kerwetage.
Den Zwiwwelböck, die hier jeder kennt,
wünsche ich immer ein volles Zelt.
Macht's gut, schöne Zeit, halt eich munter und gesund,
dann geht's hier im nächsten Jahr auch wieder rund.
Und ich wünsche mir, dass ich euch dann all' wieder hier seh',
es grüßt euch de Kerweborsch von de AG. ---- Dankschääää!!

Rainer Hannemann, 30. August 2008



"Hoscht de Petra ehrn neie Verehrer schunn gsehe ?
Der hott jo e paar Händ wie Kohleschibbe"
"Ach wass - soo riesisch groß?" ----- " Nä - so dräggisch!!!"

Pälzer Pundtopf - Grundrezept:

Zuerscht brauche merr enn grooße Hawwe - wu dess alles noikummt:
1 Pund Geduld, 1 Pund Mie, 1 Pund Fleiß, 1 Pund Zufriedenheit,
1 Pund guude Wille, 1 Pund Lebensluscht, 1 Pund Schlaueit, 1 Pund Grips,
1 Pund Toleranz, 1 Pund Schbarsamkeit, 1 Pund Verantwortung,
1 Pund Oschdand, 1 Pund Redlichkeit, 1 Pund Freundlichkeit,
1 Pund Bescheidenheit, 1 Pund Disziplin unn ´s Wischdigschde
2 mool 1 Pund Humor (der kann ruisch e Bissel vorschmegge).
Alles zusamme e Lääwe lang leicht vor sisch hie köschle losse
unn jeden Daag frisch abschmegge.

Oisischt iss de erschde Weg zur Besserung:

Dessjohr ware merr im Urlaub im Allgäu. Meer sinn uff de Berge rumgekraxelt
unn hänn die wunderbar Aussicht genosse. Dodebei griggt merr naddierlich enn
gewaldische Hunger, awwer wammer dann an de Berghitte die Preise sieht, ver-
geht er ähm als ganz schnell. Drum hämmer schmunzle misse, wie merr denn
Schruch am Oigang vunnre Werrtschaft iwwer de Schbeisekaad gelese hänn:

" Das Leben besteht aus Geben und Nehmen - meist nehmen wir zu viel "

Im Februar hott uns die Fraa Prof. Sokop widder enn lieve Brief ausem Wiener "Exil" zugschiggt. Dort schreibt se unner Annerem ah Texte in Wiener Mundart unn weil se ehr aldie Heimat äfach nit vergesse kann, schreibt se uns als e Bissel wass uff Pälzisch. Grad hott se uns mit ehrm Mann in Flomerschemm besucht unn sie fräät sich beschdimmt, wammer hier enn Auszug vunn ehrm Brief ins Heftel bringen:

Hallo,
jetzd hawwisch grad Luschk, e bissel zu pälzle. Isch hab jo heit moorsche die Fronkedahler Fasnachts-Sitzung im Fernsehe gsehe un donn e bissl was vum Roosemondagszuug. De Unnerschied zu´ner Wiener Faschingsitzung is der, dass mir hier nit schunkle dun, un dass de Dusch erst nooch de Lacher unnem Beifall kummd un nit vorher, wu donn so e peinliches Loch entschdehd, bis die Leit wisse, ob des was zum Lache war. Do hab isch jetzt e paar Witzelscher ferr eisch - un weil bei eisch die Saarlänner dess Selwe sin wie fer uns die Burgelänner, daaf isch se ääfach um:

En Saarlänner find en Schbischel. Er guggt noi un find des schää, was er do siehd. Dehääm verschdeggelt eren. Die Dochder finden, guggd noi, laafd zur Mudder un saat *"Du, isch glaab de Babbe hot e Freindin"*. Do guggd die Mudder a noi und mäant:

"Die gännischem!"


*

Uffem indernatzjonale Kongress gibt en Saarlänner oo: *"Es war en Saarlänner, der 1793 die Klobrill erfunde hot"*

Do ruft ääner aus de erschde Reih: *"Jo awwer es waa en Pälzer, der hunnert Jahr schbeeter e Loch noigschnidde hot"*.

*

Do schdehen enn Saarlänner unn en Pälzer uff re hohe Brick un guggen nunner. Do saat de Saarlänner: *"Ich deet jo zu gern mol sehe, wie's unner dere Brick aussieht"*. Do meent de Pälzer: *"Des kenne mer mache, isch halt disch on doine Hossedräager un do kannscht du unner di Brick guggle"*. - Des machen se donn aa un wie de Saarlänner so hängt, fongt er oo zu lache: *"Isch schdell mer jetzd grad vor, was du ferr e bleedes Gsischt mache deetschd, wonn isch moi Hossedreeger uffmach un se dir ins Gsischd schnalze loss."*



Liewe Leser unn Freunde
vumm Flomerschummer Gebabbelheft,
die AGF bedankt sich widder ganz herzlich ferr die Schbende,

die nooch dem letschde Heft bei uns oigange sinn.

Naddierlich iss die AGF weiterhie dankbar ferr jedie Unnerschditzung -
ferr´s Gebabbel-Heft unn ah ferr alle annre zukinfdische Brojegte.

Unser Schbende-Oinehmereie sinn:

AGF: Sparkasse Rhein-Haardt

BLZ: 54651240 - Konto Nr. 240030106

Rainer Hannemann, Leiniger Str. 12, Eppstein
Christl + Rolf Müller, Händelstr. 3, Eppstein
Ursula Lutz, Freinsheimer Str. 104, Flomersheim
Michael Gaida, An den Pflanzgärten 13, Flomersheim
Helge + Walter Rupp, Freinsheimer Str. 107, Flomersheim



Die Leesung vumm Rädsel Nr. 17 war:

FLOMERSCHUMMER GRUMMBEERE

Am 13. April hott die Glücksfee Birgit Bruder
bei de AGF-Sitzung die Gewinner gezoge:

3. Preis: Michael Gaida - 1 Flasch Woi unn e Ti-Shöört
2. Preis: Jürgen Bracht aus Derkem - 1 Flasch Woi unn e Diseiner-Grawatt
1. Preis: Dietmar Franz aus Hanhofe - Kaffeemaschien



**Die Leesung ferr dess neie Rädsel bidde bei
Rupp, Freinsheimer Str. 107 bis Ende Januar 2009 oischmeiße.**

Imbressum:

Idee/Gscheidung/Illuscheidung/Rädsel: Walter Rupp
Redagzion: AGF-Arweitskreis "Flomerschummer Gebabbel"
Druck: Fa. Erdelmeier - Medienagentur. Druck. Verlag - Worms
Drukksfehler sinn beabsichdischt unn exdra zur Unnerhaltung
oigebaut. Wer ähner findt, der derfen behalde.
Beidrääg ferr Nr. 19 bidde abgewwe bei Rupp, Fränsemer Str. 107
Flomerschumm im November 2008